

Aurtengo jaietan berritasun handia izango dugu. Handia, bi zentzutan: duen garrantziagatik eta tamainagatik. Izan ere, bi erraldoi berri estreinatuko dituzte Pentekostetan. Estreinaldirako, gainera, ekitaldi berezia antolatu dute: erraldoi, buruhandi eta kiliki konpartsen alardea. Zapatuan izango da, 18:30ean, eta Urretxu, Arrasate eta Bergarako konpartsek parte hartuko dute. Hortxe kaleratuko dituzte lehenengoz bi erraldoi berriak.

Udal arduradunek aspalditik zeukaten buruhandi, erraldoi eta kiliki konpartsa sendotzeko helburua, erraldoiei dagokienez, batez ere. Izan ere, bi bakarririk zeuden, bikote baserritarra, eta beste birekin osatzea erabaki dute.

Mende hasierako gizon eta emakume oso dotoreak errepresentatzen dituzte, eskumako irudian ikus daitekeen moduan. Erraldoi berriak Mikel Ibarzabal panpinagileak egin ditu, udalak eskatuta. Izan ere, udalak Bergarako herriarendako propio egindako erraldoiak nahi zituen, ez seriean egindako bi erraldoi. Gauzak horrela, eta helburua mende hasierako bi kaletar dotore egitea izanik, garai hartako Eulalia de Abaitua argazkilariaren irudietan oinarritu da egilea erraldoiak egiteko. Jantziak, batez ere. Hark erretratatzen zituen pertsonen jantzietan. Emakumezkoarena, kasu, Eulalia de Abaituaren beraren irudi batean.

Gizonezkoarena egiteko, Ainhoa Garitano diseinatzaile bergararrari eskatu zion aholkua Mikel Ibarzabal erraldoien egileak.



Ongi etorri, Erraldoi jauna eta anderea

Zapatuan egingo den alardean aurkeztuko dituzte

Iturkintz Berri

INSTALAZIOAK: Iturkintza, Berogintza, Gasa

Jai zoriontsuak!

Amillaga 1 (B Pabilioia) 943 76 28 04 BERGARA

ALARDEA ETA KALEJIRA

Aspaldian ez da erraldoien alardetik egin Bergaran. Horixe izango da, hortaz, aurtengo berritasunetako bat jaietako egitarauan. Hiru konpartsak parte hartuko dute: Arrasate, Urretxu eta Bergarakoak hain justu ere. Arrasateko konpartsak lau erraldoi, hainbat kiliki eta dultzainero eta txistulari taldea ekarriko ditu. Urretxukoak, berriz, lau erraldoi. Bergarakoari dagokionez, lau erraldoi eta dultzainero eta txistulari taldeez egongo da osatuta. Horrez gain, Xamatz dantza taldeko eta Jai baztordeko hainbat kide ere izango dira alardean, eurak arduratuko dira eta erraldoiak eramateaz.

Alardean arituko diren konpartsek ondorengo ordena jarraituko dute kalejiran: Udal Txistulari Banda, Bergarako erraldoi zaharrak, Urretxuko dultzainero eta erraldoiak, Arrasateko dultzainero, erraldoi eta kilikiak, eta azkenik, kalejira ixten, Bergarako dultzainero eta erraldoi berriak. Dultzaineroek kalejira joko dute, eta erraldoien dantzaldia



la hiru metro eta erdi eta 35-40 kilogramo inguruko pisua dute erraldoiek.

hastean, baltsak.

Hori guztia zapatuan izango da, 18:30ean. Horrez gain, baina, Pazko astelehenean, 20:00ak aldera, Bergarako konpartsa oso-osorik ikusteko aukera

izango dugu. Erraldoi, buruhandi eta kilikiek kalejira egingo dute. Buruhandiek, gainera, jantzi berria estreinatuko dute. Buru bakoitzari dagokion jantzia egin diote.<



Mikel Ibarzabal. Panpinagilea

«Zailtasun handiena tamaina izan da»

Egiten dituzun lehenengo erraldoiak dira. Nola joan da lana?

Ezberdina da zerbait lehenengo aldiz egin edo esperientzia izatea. Baina, nire ustez, nahiko ondo joan da. Izan ere, materiala aurretik erabilia neukan. Zailtasun handiena tamaina izan da. Izan ere, ezberdina da txotxongiloak egitea edo erraldoiak. Proporzioei eustea ez da horren erraza. Esaterako, burua lurrean ikustea edo gorputz gainean oso ezberdina da; eta horiek guztiak kontuan hartu beharrekoak dira.

Zein material erabili duzu?

Egurra eta beira-zuntza, betiere, erraldoiek pisu handirik har ez dezaten. Gainera, Bilbo, Deustua, Arrasate... hainbat herritako erraldoiak ikustera joan nintzen badaezbada ere. Guztira 35-40 kilo pisatzen dute, eta ia hiru metro eta erdi luze dira. Ondo zainduz gero, erraldoiak bizitza osoa irauteko modukoak dira. Seriean egindakoak baino gehiago.

Zergatik mende hasierako kaletar dotoreak?

Udalak hala eskatuta. Baserritar bikotea egonik, kaletar bikote dotorea nahi zuten, baina ez seriean egindakoa, pertsonalizatuagoa. Orduko janzkera kopiatzeko orduan ere, Eulalia de Abaitua argazkilariaren irudia eurek eman zidaten.